

दिनांक 22.03.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- इसरो कर्नाटक री चित्रदुर्ग परीक्षण रेंज मांय 'रीयूजेबल लॉन्च व्हीकल' पुष्पक कामयाबी सागे उतार्यो।
 - भाकपा सीकर लोकसभा सीट ऊं अमराराम ने उम्मीदवार बणायो-भारतीय जनता पार्टी री कोर कमेटी री मीटिंग मांय चुनाव रा बारा माय विगतवार चर्चा करी ज्यी।
 - लोकसभा चुनाव मांय वोट जरूर देवण बाबत् जाग जगावण सारू राज्य मांय न्यारा-न्यारा कार्यक्रम।
- अर
- इंडियन प्रीमियर लीग क्रिकेट टूर्नामेंट आज तमिलनाडु रा चेन्नई मांय सरू व्हे रह्यो है।

000

भारतीय अंतरिक्ष अनुसंधान संगठन-इसरो आज कर्नाटक री चित्रदुर्ग परीक्षण रेंज मांय 'रीयूजेबल लॉन्च व्हीकल' पुष्पक ने कामयाबी सागे उतार्यो। इसरो रा अध्यक्ष एस सोमनाथ सोशल मीडिया प्लेटफॉर्म रे जरिये दिया ज्या संदेश मांय अंतरिक्ष यान रे पूरी तरह ऑटोमेटिक मोड मांय चालण, उतरण अर ईंधन प्रबंधन सारू इण ऊं जुड़ी टीम ने बधाई दीनी। इसरो अंतरिक्ष यान आरएलवी-एलईएक्स-02 ने कामयाबी सागे उतारण सागे ई नेविगेशन, नियंत्रण प्रणाली, लैंडिंग गियर अर गति कम करण वाली प्रणालियां रा हलका मांय देशी प्रौद्योगिकियां ने ओजू स्थापित कीनी है।

000

प्रधानमंत्री नरेंद्र मोदी ने भूटान रा सब ऊं ऊंचा नागरिक पुरस्कार, ऑर्डर ऑफ द ड्रुक ग्यालपो ऊं नवाजी ज्या है। भूटान नरेश जिग्मे खेसर नामग्याल वांगचुक आज भूटान री राजधानी थिम्फू मांय प्रधानमंत्री ने ई पुरस्कार ऊं नवाजा। ई मौके प्रधानमंत्री मोदी कह्यो के ओ मान भारत अर ई रा 140 करोड़ रेहवासियां रो मान है। वे कह्यो के हर पुरस्कार अपने-आप मांय खास व्हे है, पण जद दूजा देश ऊं ईनाम मिले है तो इण ऊं दोन्यू देशां रे सही गोला माथे आगे बधबा री ठा पडे है। प्रधानमंत्री मोदी आज थिम्फू रा ताशीछोडजोंग महल मांय भूटान नरेश सागे बातचीत ई कीनी। ई दौरान दोन्यू नेता भारत अर भूटान री दोस्ती और बधावण रा तरीका रा बारा मांय चर्चा कीनी।

000

भारत री कम्युनिस्ट पार्टी -मार्क्सवादी सीकर लोकसभा सीट ऊं अमराराम ने उम्मीदवार बणायो है। पार्टी री राजस्थान राज्य कमेटी री आज जयपुर मांय व्ही मीटिंग मांय ओ फ़ैसलो करी ज्यो। मीटिंग मांय केंद्रीय कमेटी री ओर ऊं पर्यवेक्षक रा तौर ऊं पोलिट ब्यूरो सदस्य वृंदा करात अर केंद्रीय कमेटी सदस्य बीजू कृष्णन मौजूद रह्या। ध्यानजोग है के कांग्रेस आ सीट वां री सहयोगी पार्टी भाकपा सारू छोड़ी है।

000

लोकसभा चुनाव सारू प्रदेश भाजपा रा प्रभारी डॉ. विनय सहस्त्रबुद्धे आज जयपुर मांय सहप्रभारी विजया राहटकर अर प्रवेश वर्मा सागे पार्टी री कोर कमेटी रा सदस्यां ऊं बातचीत कीनी। बातचीत मांय मुख्यमंत्री भजनलाल शर्मा, उपमुख्यमंत्री दिया कुमारी अर भाजपा रा प्रदेश अध्यक्ष सी.पी. जोशी सागे ई पार्टी रा आला नेता राजेंद्र राठौड अर सतीश पूनिया ई सिरकत कीनी। कोर कमेटी री मीटिंग पाछे भाजपा रा ओहदादारां अर चुनाव प्रबंधन समिति री मीटिंग व्ही।

000

निर्वाचन आयोग स्वतंत्र अर बिना पक्षपात लोकसभा चुनाव करावण सारू दो हजार एक सौ पर्यवेक्षक तैनात कीना है। अ पर्यवेक्षक देशभर मांय जिला निर्वाचन अधिकारियां अर दूजा अहलकारां रा काम माथे निगराणी राखेला। ई बीचे लोकसभा चुनाव सारू राज्य मांय हाल ताई जयपुर, जयपुर ग्रामीण, दौसा, गंगानगर, बीकानेर, सीकर अर झुंझुनू लोकसभा सीटां सारू 10 नामपाना दाखिल करी ज्या है।

000

दिल्ली रा मुख्यमंत्री अर आम आदमी पार्टी रा संयोजक अरविंद केजरीवाल री ई.डी. कानी ऊं गिरफ्तारी रे खिलाफ पार्टी रा नेता अर कार्यकर्ता आज जयपुर मांय भारतीय जनता पार्टी रा दफतर सामी प्रदर्शन कीनो। ई दौरान आं लोगां री पुलिस ऊं झड़प व्ही अर पुलिस ने ताकत काम लेवणी पडी। ई दौरान कुछ कार्यकर्तावां रे लाग्यी। प्रदर्शन करण वाळा कुछ कार्यकर्ता भाजपा रा दफतर मांय दाखिल व्हेवण री कोशिश ई कीनी। प्रदर्शन रे दौरान पुलिस कुछ लोगां ने हिरासत मांय ले लीना। प्रदर्शन री बगत भारतीय जनता पार्टी रा दफतर मांय मुख्यमंत्री भजनलाल शर्मा अर भाजपा रा चुनाव प्रभारी विनय सहस्त्रबुद्धे समेत केई आला नेता मौजूद हा।

000

लोकसभा चुनाव मांय बत्ता ऊं बत्ता लोगां मांय वोट देवण बाबत् जाग जगावण सारू प्रदेशभर मांय कार्यक्रम राख्या जा रह्या है। श्रीगंगानगर मांय वोट देवण वाळां मांय जाग जगावण सारू हस्ताक्षर अभियान चलायी ज्यो है। सादुलशहर विधानसभा हलका मांय रंगोली सजा र वोट जरूर देवण रो संदेश दियो ज्यो। भीलवाड़ा मांय हेलन केलर विकलांग सेवा संस्थान रा दिव्यांग विद्यार्थी जागरूकता रैली निकाळ र वोट जरूर देवण रो संदेश दीनो। जोधपुर रा सरकारी कॉलेज मांय मतदाता जागरूकता ऊं जुड़ी नारा माण्डण अर पोस्टर बणावण री होड़ां राख्यी ज्यी। सवाईमाधोपुर मांय केन्द्रीय संचार ब्यूरो रा क्षेत्रीय कार्यालय री ओर ऊं लहसोड़ा अर अजीतपुरा गांवां मांय मतदाता जागरूकता अभियान रा तैत होड़ां राख्यी ज्यी अर वोट देवण रा महत्त्व रा बारा मांय विगतवार जाणकारी दीरीजी। **सवाईमाधोपुर** मांय मुख्य चिकित्सा अर स्वास्थ्य अधिकारी डॉ. धर्मसिंह मीना स्टाफ रा सदस्यां ने वोट जरूर देवण री शपथ दिरायी अर सी-विजिल एप री जाणकारी दे र आ ऐप डाउनलोड करायी। **बाड़मेर** जिला रा सरहदी फागलिया पंचायत समिति री पनोरिया ग्राम पंचायत मांय स्कूली विद्यार्थी अर शिक्षक मतदाता जागरूकता कार्यक्रम राख्यो। **झालावाड़** लोकसभा हलका मांय मतदान प्रतिशत बधावण रा मकसद ऊं पंचायत समिति मनोहरथाना रा पीपलिया अर खुरी मांय मजूरां ने वोट देवण रा महत्व री जाणकारी देता थकां वां ने वोट जरूर देवण री सौगंध दिरायी ज्यी।

000

लोकसभा चुनाव मांय वोट देवण बाबत् जाग जगावण सारू आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। आज पेश है सिरोही जिला रा जय पारीक रो संदेश

000

कांग्रेस री प्रदेश इकाई पार्टी रा बैंक खाता सीज करण री आलोचना कीनी है। राज्य रा पैली वाळा मुख्यमंत्री अशोक गहलोत आज खबरनवीसां सागे बातचीत करता थकां कह्यो के लोकसभा चुनाव ऊं पैली इनकम टैक्स डिपार्टमेन्ट री ओर ऊं कांग्रेस रा बैंक खाता फ्रीज करावण रा हुकम ठीक नी है। वे कह्यो के कांग्रेस रा बैंक खाता फ्रीज करावण रो मुद्दो जनता ताई पूग ग्यो है।

000

फागण रा महीना मांय मिंदरां समेत न्यारी-न्यारी ठौड़ां फागोत्सव मनायो जा रह्यो है। जोधपुर रा कटला बाजार रा कुंज बिहारी मिंदर मांय वृंदावन अर बरसाना री भांत लाडूआं री अर लड्डुमार होळी खेली ज्यी। भगवान कृष्ण अर राधा रा भेष मांय आया जातरू ई लड्डुमार होळी खेली। ई दौरान राधा-कृष्ण रो घणो सोहवणो श्रृंगार करी ज्यो। दूजी कानी ब्रज हलका रा भरतपुर मांय **रंगीलो महोत्सव** रा तहत महामूर्खाधिराज री शोभायात्रा निकाली ज्यी। म्हाणा खबरनवीस बतायो के शोभायात्रा मांय वोट देवण रा महत्त्व री जाणकारी ई दीरीजी।

ई बीचे सीकर रा खाटूश्याम जी मिंदर मांय होळी अर खास सेवा-पूजा रे कारण 25 अर 26 मार्च ने पट बंद रेहवेला। मिंदर रा पट 27 मार्च ने संवारे साढ़े पांच बज्यां मंगला आरती सागे ओजू खुलेला।

000

आज विश्व जल दिवस है। ई मौके प्रदेश मांय ई केई कार्यक्रम राखी ज्यो। दौसा मांय पाणी रा बावडियां सरीखा जूना स्रोतां री साफ- सफाई रो अभियान चलायी ज्यो। ई दौरान राखी ज्यो श्रमदान रा कार्यक्रम मांय दौसा रा जिला कलेक्टर देवेन्द्र कुमार अर एस.पी. रंजीता शर्मा ई सिरकत कीनी। ई सागे ई जनता री मदद ऊं चाणक्य छात्रावास मांय ई सफाई करी ज्यी। श्रमदान कार्यक्रम रे दौरान जिला निर्वाचन अधिकारी वोट जरूर देवण री शपथ ई दिरायी ज्यी।

0000

इंडियन प्रीमियर लीग क्रिकेट टूर्नामेंट- आई.पी.एल. आज तमिलनाडु रा चेन्नई मांय सरू व्हे रह्यो है। सरूआती मुकाबलो लारली चैंपियन चेन्नई सुपर किंग्स अर रॉयल चैलेंजर्स बेंगलुरु बीचे व्हेला। ओ मुकाबलो चेन्नई रा एम.ए. चिदम्बरम स्टेडियम मांय रात 8 बज्यां सरू व्हेला। ई दफा चेन्नई सुपर किंग्स री कप्तानी अनुभवी खिलाडी महेन्द्र सिंह धोनी री ठौड़ ऋतुराज गायकवाड करेला।

000